

671.3443
078
17

光州志

光州志卷之七

光州直隸州知州楊修田總纂

善行列傳

漢

魏桓

魏桓安陽人以清節數被徵辟鄉人勸之應聘桓曰夫干祿求進所以行志也今後宮數千其可損乎廐馬千匹其可減乎左右權倖其可除乎皆曰不可桓嘆曰使桓生行死歸於諸子何有哉遂隱身不出

節鑑通鑑

五代

王延嗣

王延嗣光州人唐亡梁太祖拜王審知爲中書令封閩王延嗣力諫曰義不帝秦此其時也時強藩巨鎮僭號審知有効輦意延嗣力諫審知雖不樂其言然終身不失臣節延嗣之力也

節舊志

詹君澤

詹君澤光州人避亂遷閩隱植德山下嘗詣閩王上書閩王昶欲留之君澤以詩謝之曰周粟縱容甯忍食葛廬頻

顧漫勞思

節省志

宋

陳景夏

宋嘉定間包恢厯知台州建甯破豪猾去姦吏治蠱獄政聲赫然嘗因輪對曰此臣心惻隱所以深切爲陛下告者陛下惻隱之心如天地日月其閉而食之者曰近習曰外戚耳未幾以待御史周坦論罷光州布衣陳景夏上書云包恢剛正不屈之臣言者汙讒之耳後四年起恢爲廣東轉運判官權經畧使尋爲大理少卿

節宋史

董明道

董明道喪信人母死出葬明道不忍舍潛匿墓中人瘞之經三日家人發塚取之明道無恙終身廬於墓側

節宋史

元

移刺伯顏

移刺伯顏息州人居喪有至行廬墓次負土成墳有司以

聞詔旌之

節舊志

明

岳仲明

岳仲明固始人宋鄂王七世孫也洪武初徙家於汴仲明少負清節隱居不仕嘗廬墓九年有司以孝廉舉朝廷三召不起賜號純孝先生今三召祠故址尙存所著有遺安

集

節郡志

張孝子

張孝子名失傳息縣人少以勇力稱年三十時嘗有虎入其家父爲所持幾不免孝子曰吾以身當之持刀直前大聲叱虎虎不敢動竟舍而去父獲免於難人方之楊香云

節舊志

劉進

劉進字文升光州人博學惇行景泰癸酉舉於鄉任太平府通判聞父訃卽日歸比抵家母疾亦篤進日夜侍側衣不解帶湯藥必親嘗母卒水漿不入口旣葬廬於墓側寢苦枕塊毀瘠骨立手植松柏數百株有烏雀鷗鷺集之

異有司上其事詔旌表之免喪超拜太僕寺丞進階奉政大夫學士李賢傳其事

節省志

喻謙

喻謙光州人三歲失父賴母蔡氏鞠育長爲庠生及母八十遭疾謙嘗藥侍寢四十餘日及卒哀毀幾滅性凡喪制一遵文公家禮廬墓側三年負土成墳悲號無間墓旁湧甘泉二產靈芝九人以爲至孝所感事聞旌表

節舊志

吳魯

吳魯字宗道固始人賦性敦篤操行正直補邑弟子員苦志力學游上蔡李公門領洪治辛酉鄉薦肄業南雍博訪

高士首推羅一峯舍已從人雖片善必取後授高密知縣

致政

節舊志

閻道隆

閻道隆字履之禮部郎中倫子隆天性孝友幼事父母動
遵身教父歿廬墓三年母歿亦如之貢入太學任章邱縣
主簿以思先人坟墓逾月輒告歸課子孫以孝弟爲先年

八十一卒

節舊志

汪簡

汪簡字居敬固始人家貧力學時或缺燈火卽夜就鄰壁
資其餘照誦讀不輟幼失恃哀慕終身後父疾祝天以身

代疾草嘗糞事繼母凡三俱如所出其繼母李生三子一女母亡簡皆撫養成立畢其婚嫁晚年以歲貢授攸縣訓導卒於官

簡舊志

李瓚

范亮

李瓚字良玉固始人友讓謙恭雖童時未嘗慢事寡嫂以輸粟受冠帶鄉人皆式其行正德壬申流寇犯邑瓚戀塋墓不忍去乃匿於城南之祖塋爲賊所執旣而察其忠厚遂釋之人以爲盛德之報也又邑人范亮字子明弟卒遺孤六人皆穉弱亮撫之與子均三世同居鄉人多其孝友

簡舊

志

劉守謙

劉守謙息縣人性廉介不苟邑置社學舉爲社師訓弟子以孝經小學大義會有鄧灣里民催糧遺糧銀三十兩於道謙得之曰官賦且獲罪矣遂守以待遺者至詢其故銖兩封識悉符舉還之其人願酬半以報謙曰久待爾豈欲分耶慮子罹官罪特相還爾竟不受子四端登進士擢浙江道御史人以爲還金之報云

節舊志

安思恕

安思恕字守仁嘉靖乙卯舉於鄉喜任俠走馬燕山有封狼居胥意歸而母沒哀毀幾絕結廬墓旁有白烏冬笋之

祥居廬百家之言無不涉獵尤喜讀易因而有悟遂絕意仕進搆天中山房默坐研思至忘寢食一日遣友人書曰始吾從羣書入茫乎莫得今從靜中討出端倪方信此心原與天地萬物無二道其在茲乎士人翕然宗之所居白沙關山毗連楚省民俗頑悍乃結社其間講明正學并發揮高皇帝聖諭六條聽者如堵化柴山巨盜四十八人太守史公桂芳異其事召四十八人者至皆稱願向化因請於中丞御史待以不死蓋隆慶己巳間事也明年兩臺疏薦孝友詔下徵用會病卒弟思憲師事恕亦以篤行被旌

節家傳

徐達

徐達光山人操行端嚴言動不苟子瑾宣德間以進士歷官布政每受封輒叩天謝曰願天祐達兒毋貪毋酷以報

國家

節舊志

李果

李果光山諸生篤志正學不惑於二氏聞吳康齋倡學豫章將往從之見蔡廣文斌至喜曰道在是矣遂執經受業

爲廣文高弟子

節舊志

郝文賓

郝文賓侍郎璜孫質樸好善隱於耕詔授冠帶侍郎喻時

贈以詩云九十六年傲歲華寶精玉系託生涯慣看日月
不知老喜種芝蘭是世家

節舊志

羅文新

羅文新叅議寬父其先人璜當正德時流寇之變居人流
遁逋國賦者百餘家皆代償之歲祿又出穀以賑饑者再
傳至文新敦厚樂施不減於璜萬厯四十五年州境奇荒
新捐穀三百石輸官賑濟弟武新早卒撫孫姪如其子以
子寬贈陝西按察副使

節舊志

穆嵩

范奇元

穆嵩字中鎮息縣人性方介躬耕力學取予不苟嘉靖間

以恩貢除臨洮府司訓不就課子授徒敦禮教善鄉里重之同邑范奇元亦以明經待銓於吏部爲繼母屈氏年老左右就養強年不仕後母歿傷祿不逮親力農教子終老於家郡邑重其行請於督學榮以冠帶表其門閭

節舊志

王啟

余伯華

王啟光山人父母歿廬墓三年後啟歿子澤廬墓亦如之又余伯華亦光山人生未一週父卽歿母撫之成立華事母篤孝至老不衰

節舊志

陳瑚

王子敬

陳瑚學博裕孫志行純潔與物無忤兄弟百口同居不爲

異產其孝友出於天性處鄉無小大咸敬服之年及耄無疾而終王子敬固始諸生甘貧自守訓蒙以給事二親備極孝養母死廬墓三年不歸

節舊志

王建

王建固始人父愷官通判建少喜豪宕後自國學卒業歸遂檢飭自守言訥訥如不能出親歿廬墓側斯夕哭奠哀感路人值歲荒盜過其廬皆相戒勿犯弟述有過輒自鞭其臂曰兄弟手足也吾當自責以警之述因愧悔改行其

孝友類如此

節舊志

張鳳翼

張鳳翼固始諸生父染病甚危翼嘗糞味苦進藥遂愈父有過幾諫長跪不起逢怒受杖亦無難色此其篤行卓卓者節舊志

方志充

方志充固始人事母備極孝養滫瀡甘旨不難遠致以進母年八十餘無一日不得其歡心且矜憐窮困時解衣推食以拯救之又正直好義鄉鄰有爭者咸來就質於充待一言以爲決殆庶幾乎王烈之風焉子端隆慶丁丑成進士歷官按察司僉事人以爲積德所致節舊志

黃經

黃經字大用息縣人正德間貢入太學以親老不仕父元吉終廬墓感祥芝事繼母尤能得其歡心贍宗族恤孤貧好善不倦里人推其行請祀鄉賢

節舊志

梁顯

梁顯幼有孝行至老彌篤母卒顯已七十猶廬墓三年朝夕哭奠不衰

節舊志

尹朝璉

尹朝璉息縣人奉事父母朝夕不懈稱養志焉親歿廬墓踰三年猶不忍去有謂其已久者泣曰是何能卒吾志也族人哀之歲給衣食以成其志及卒曰吾得見親於九原